



basic education

Department:
Basic Education
REPUBLIC OF SOUTH AFRICA

NATIONAL SENIOR CERTIFICATE

LIBANGA 12

SISWATI LULWIMI LWASEKHAYA (HL)

LIPHEPHA LEKUCALA (P1)

INDLOVULENKHULU/MASHI 2011

EMAMAKI: 70

SIKHATSI: 2 ema-awa

Leliphepha linemakhasi lali-10.

TICONDZISO KULABAHOLWAKO

1. Leliphepha lehlukaniswe tigaba LETINTSATFU:

SIGABA A: Sivisiso	(30)
SIGABA B: Sifinyeto	(10)
SIGABA C: Luhlelo nelulwimi	(30)
2. Fundza tonkhe ticondziso ngekucophelela.
3. Phendvula yonkhe imibuto ngeSiswati.
4. Cala LESO NALESO sigaba ekhasini LELISHA.
5. Dwwebela ekugcineni kwaleso naleso sigaba.
6. Tinombolo tetimphendvulo atihambisane naleto letisephepheni lemibuto njengobe tinjalo.
7. Shiya umugca emkhatsini wetimphendvulo takho.
8. Bhala ngebunono nangesandla lesifundzekako.
9. Caphelisia sipelingi/lupelomagama nendlela lewakha ngayo imisho.

SIGABA A: SIVISO**UMBUTO 1**

1.1 Fundza letheksthi lelandzelako bese uphendvula imibuto letawulandzela.

Kute lokunye lokuvakalako. Kuphefumula kwabo kuphela. Thembi uyakhala. Bakhala nje bagcolotelene. Atsatse liduku Thembi esule Thami tinyembeti. Ambuke ngemehlo lagcwele lutsandvo. Uyamtsanza Thami wakhe. Loko ukuva ekhatsi ekujuleni kwenhlitiyo yakhe. NaThami uyatifela ngaThembi wakhe. Eciniweni bayatsandzana labantfu lababili.
 "Thembi, kodvwa yini ungvise buhlungu lobungaka?"
 Atsi uyaphendvula Thembi, aphakamise sandla Thami.
 "Asewume kancane, nginike litfuba. Lamuhla ngifuna kukuvulela sifuba sami. Ngicabanga kutsi lamuhla lilanga lami lekuhamba kulomhlab."

Esule tinyembeti, naThembi atesule. Alalele, alalele sitsandwa sakhe lasitsanza ngako konkhe kucabanga nekwenta kwakhe. Letitsandzani tingematse nelulwimi.

Lamuhla Thembi ucelile emsebentini khona atewuba ndzawonye nesitsandwa sakhe. Ingani phela lamuhla lilanga labatsandzana ngalo eminyakeni lesihlanu leyengca. Phela bebachele kuligubha kanye yonke iminyaka. Lamuhla futsi bagubha umnyaka wabo wekucala bashadile. Phela lelilanga lalamuhla lekutalwa kwelutsandvo lwabo, kantsi futsi licondzene nelilanga lemshado wabo. Loko bakwente ngabomu.

"Thembi, bengisolo ngicabanga kutsi mine nawe sadalelwana. Sekuyangikhanyela bha mine kutsi besityenga nje. Ngubani longahlala nendvodza leseyiphendvuke umntfwana? Ngubani longemela kuphiphana nemuntfu lomdzala? Ngubani longemelana nekungayitfoli injabulo yamakoti losasemncane? Hhayi sasitsi siyazama ngalemoti, kantsi ..."

Atsi uvula umlomo Thembi, amngene emlonyeni Thami.
 "Ngitsite bindza ngicedze kucala. Ngeke kungisite kutsi ngikuncishe injabulo lebewungayitfola kulabanye. Ngiyakutsanza Thembi. Lokwa ngisengakalimali, bengihlala ngicabanga ngawe busuku nemini. Bengicabanga tonkhe tindlela lebengingakujabulisa ngato. Lamuhla ngihleti siphelane lapha kulombhedze. Kute lesengikwati kutentela kona. Kufa lesingentasi neluhlangotsi akusyo intfo yekudlala. Yini lengingatsi sengiyayiphilela emhlabeni ngobe sengikwente sisebenti nesiboshwa sami?"
 Bakhale bobabili. Emavi aThami aliciniso lelibuhlungu kakhulu kuThembi. Besulane tinyembeti.

"Kudzala ngasho kutsi mine nawe Thami siyakwehlukanisa kufa. Lengoti leyakuvelela itsetse incenye yemtimba wakho kuphela, kepha hhayi lutsandvo lwami kuwe. Thami, ngitimisele kukwentela nobe ngabe ..."

Angakacedzi, amngene emlonyeni Thami.

"Yinye kuphela intfo longangentela yona Thembi mntfwanaketfu."

"Yini Thami?"

"Thembi ngicela kutsi ungentele shevu unginatsise, ngitawushiya incwadzi leshoko kutsi ngitibulele."

Angatikhola tindlebe takhe Thembi. Etfuke aze ahlahle emehlo. Lehluleke nekuphuma livi. Achubeke Thami.

"Ngicinisile Thembi. Nangabe ungitsanza sibili, yenta lentfo lengiyishoko. Ngifisa kufa ngalelilanga lowanikela ngalo imphilo yakho kimi. Lilanga lesashada ngalo. Lelilanga leli, ngifuna libe yincophamlandvo, lotawutekela titukulwane takho. Umtjele naloyo lotawuba ngumkhwenyane wakho lomusha kutsi angisite akuphatse kahle."

"Thami, ngeke ngikumele kukubona ufa embikwami. Loku lokushoko ngitakwenta, kepha nami ngihamba nawe. Angiboni kutsi ngingakhona kuphila ngaphandle kwakho. Sitawutibala sobabili letincwadzi bese siwunatsa sobabili loshev, sife sobabili."

- 1.1 Phendvula yonkhe imibuto ngekubhekisa tonkhe timphendvulo takho kuletheksthi lengenhla.

- 1.1.1 Kwentani kungena umuntfu emlonyeni? (1)
- 1.1.2 Bhala umusho losetheksthini losho kutsi boThembi naThami bebabukene emehlwani ngalesikhatsi bakhala. (1)
- 1.1.3 Usho kutsini Thami nakatsi, "Ngifuna kukuvulela sifuba sami?" (1)
- 1.1.4 Bhala sihabiso lesitheksthini lesisho kutsi Thami umtsanza kakhulu Thembi. (1)
- 1.1.5 Lesaga lesitsi, '**Likusasa alatiwa**' sihambisana njani naletheksthi lengenhla? (2)
- 1.1.6 Chaza inkinga yaThami kulomshado wabo. (2)
- 1.1.7 Ase ubhale kube kubili lokungentiwa kucedza naku lokwabangela kutsi Thami abe kulesimo lesimbona akuso nyalo. (2)
- 1.1.8 Thembi abengatikhola tindlebe takhe. Ngabe kusho kutsini loko? (2)
- 1.1.9 Yamkhubata kuphi Thami lengoti leyamvelela? (2)
- 1.1.10 Ngalelilanga labahlangene ngalo boThami naThembi bashaye tinyoni letimbili ngelitje linye. Sikusho ngani loko? (2)
- 1.1.11 Kutibulala ngabe kuyayisombulula yini inkinga? Beka umbono wakho. (2)
- 1.1.12 Kuneligama lelitsi lilanga kuletheksthi lengenhla. Akha ngalo saga. (1)
- 1.1.13 Kube bekunguwe Thembi bewutasitsatsa njani lesicelo saThami? (2)

1.2 Fundza lesibonwa lesingentasi bese uphendvula imibuto letawulandzela.



- 1.2.1 Lumeleni loluphawu lolungenhla? Usho ngani? (2)
- 1.2.2 Bhala kutsatfu lokungumphumela lomubi wekungasinaki lesecwayiso lesikuloluphawu. (3)
- 1.2.3 Chaza kutsi loku lesikubona lapha kulesibonwa kungacedvwa njani lapha eNingizimu Afrika? (2)
- 1.2.4 Bantfu labanenkinga yaloku lokukulesibonwa lisingenhla bangasitwa ngumaphi ematiko ahulumende lamabili kute bayekele kukusebentisa loku? (2)

SAMBA SIGABA A: 30

SIGABA B: SIFINYETO**UMBUTO 2**

Fundza letheksthi lelandzelako bese uayifinyeta ngewakho emagama uvete kutsi tecwayiso tini letinikwa lusha lolusandza kuphotfula etikolweni nasemanyuvesi lolufuna umsebenti. Sifinyeto sakho asibe ngemagama langabi ngaphasi kwalange-60 aphindze angabi ngetulu kwalange-70.

- Cala ngekwenta luhlaka ngembikwekufinyeta letheksthi.
- Luhlaka aluvetwe ngalokucacile. Dvweba umugca lovundlile etukweluhlaka nawucedza kufinyeta. Uma ungakakwenti loku kutawumakwa luhlaka locale ngalo njengesifinyeto.
- Sifinyeto sakho asibe ngendlela yetindzima (emapharagrafu) **letimumetse emaphuzu lasikhombisa**.
- Utawulahlekelwa ngemamaki nangabe sifinyeto sakho sibhalwe sangalandzeli indlela yetindzima.
- Khombisa linani lemagama lowasebentisile ekugcineni kwemphendvulo yakho.

Lucwaningo lutsi linyenti Iwelusha lolunamatekuletjeni nalolugogodze emanyuvesi linenkinga yekutfola imisebenti. Lukhombisa kutsi kunetindlela tekuncoba lenkinga.

Bacashi kufanele bente kutsi timo netidzingo temisebenti titfolakale kalula etinhlanganweni tabo kulabo labaphuma etikolweni nasemanyuvesi. Bacashi kufanele babe nelwati lolubanti nabacasha labanamatikuletjeni nalabasandza kucedza emanyuvesi. Loku kusho kutsi lusha kufanele lube nelikhono lekubhala umlandvo wemphilo yalo letawuhambisana neticelo temisebenti.

Ngembi kwekfuna umsebenti labasandza kuphotfula.tifundvo takamatekuletjeni netasemanyuvesi bafanele bati umsebenti labawufunako. Ngetulu kwaloko bente lucwaningo Iwetidzingo tenkampani labafuna kuyoyisebentela. Loku kabalulekile ngobe imvamisa yebacashi itsandza kucasha bantfu labanemakhono latawutfutfukisa imisebenti yabo. Labo labasandza kuphotfula kufanele bati kutsi ngembi kwekucashwa kufanele babe nelwati Iwenkhulumoluhlolo. Kufanele bati nekutsi lenkhulumoluhlolo icala ngalesikhatsi ungena nje emabalenii esikhungo labatewufuna kuso umsebenti. Bafanele betsembeke babuye batifobe. Kucasha bantfu labasandza kuphotfula.tifundvo tamatekuletjeni nasenyuvesi kunika inhlango litfuba lelihle lekutfutfukisa emakhono ebasebenti ngekutsi basebenti lesebanesikhatsi lesidze basebenta banikwe litfuba lekusita labo labasandza kuphotfula.tifundvo tabo.

Lizinga lalabaphotfule matikuletjeni nasenyuvesi labafuna imisebenti lenyuka malanga onkhe, ngaloko kufanele kucatjangwe emasu ekunciphisa lelizinga. Loku kungentiwa ngekutsi kuvulwe tikhungo tekutfutfukisa emakhono kute batfungatsimsebenti batitfolele letinye tindlela tekutfola imisebenti. Letikhungo titabasita kucondzisia kutsi bafanele babe neluhlelo Iwemphilo yabo. Bafanele bati kutsi kuba semsebentini kusho kutsini etimphilweni tabo. Labaphotfule matekuletjeni babona imphilo iluchungechunge Iwetigameko letitabatsatsa tibabeke lapho bafuna khona. Nalabo labaphotfule emanyuvesi banenkinga lefanako, umehluko kutsi bona bona titifiketi tabo tibacinisekisa kubanika imisebenti. Lomcondvo wekutsi umuntfu losaphumelele matekuletjeni nalophotfule enyuvesi vele sewucashiwe, ngiwo lobangela kutsi bangasiboni sidzingo sekusebenta ngekutikhandla.

Labasanza kuphotfula matekuletjeni nasenyuvesi bafanele bati indlela lekufanele batiphatse ngayo emsebentini. Kufanele bati kutsi bayahloba babuye bagcoke kahle nangabe basemsebentini. Kufanele bafike ngesikhatsi babuye bahambe ngesikhatsi lesifanele emsebentini. Kufanele babe nemakhono ekuchumana nalabanye bantfu. Lokubaluleke kakhulu kutinikela emsebentini kunekufuna liholo lelisetulu kwekube ligalelo lakho alibonakali.

Lokunye lokubalulekile kutsi emakhononchanti atemisebenti kufanele afundziswe lokutawulungiselela labaphotfulile kubukana nemsebenti.

SAMBA SIGABA B: 10

SIGABA C: LUHLELO NELULWIMI**UMBUTO 3**

Fundza letheksthi lelandzelako bese uphendvula imibuto letawulandzela.

Lusha Iwalomuhla luyangimangalisa ngalokutikhobosa ngelulwimi Iwalo. Kubonakala ngatsi luyakhohlwa kutsi bantfu bazabalaza kutsi tonkhe tilwimi tebantfu tilingane. Hulumende wancuma kutsi tilwimi tebantfu titawulingana futsi tihtonishwe ngalokulunganako. Ingabe lesive sitsini nakunje naso solo sahlala sidla butfongo? Lulwimi LweSiswati sekuyintfo lekujikijewana ngayo kungabi ndzabatalutfo. Kantsi yini umgogodla wenu lusha LweMaswati? Maye! Ngiyanivela ngekulahla buve benu. Nitenta emalulwane lilanga lingakatilahli kunina nje nentani? Lulwimi luni lolu lenilukhulumako? Tsatsani kimi lilanga lisekhona, uma ningafuni kwenta njalo kusho kutsi nitawuchubeka naletilwimisigodzi, sitsotsi nayo yonkhe lenhlanganisela leniyikhulumako. Phela inala ayihambi kuhamba indlala. Sive kumele sente umhlangano welwenyulo lapho sitawukhetsa khona bantfu labatakubuka kutfutfuka kwelulwimi. Kulabatawukhetfa bafana bafanele bangasali kute lelikomidi litewuba nesisindvo ngobe ngaphandle kwabo kute vele lesingakwenta. Laba bemantfombatane ningatihluphi kakhulu ngabo, bayalwati lulwimi Iwabo. "Akucalwe NgeSiswati kucala ngembi kwekutsi kubukwe letinye tilwimi, ngobe sona sibaluleke kwendlula tonkhe letinye tilwimi. Nitsini bekunene?"

- 3.1 Khokha umusho kuletheksthi lengenhla loneluelomagama lolukhomba kwesaba uwubhale phasi bese udvwebela loluvelomagama. (1)
- 3.2 Phindza ubhale lomusho lelandzelako lotsetfwe kuletheksthi lengenhla, esikhundleni seligama lelidvwetjelwe ufake mcondvofana walo.
Bantfu bazabalaza kutsi tonkhe tilwimi tebantfu tilingane. (1)
- 3.3 Kunesaga lesisetjentiswe kuletheksthi lengenhla, sikhokhe utakhele ngaso umusho lokhomba kutsi uyasati kutsi sishoni. (2)
- 3.4 Nguliphi libintana lelingema esikhundleni saleligama lelidvwetjelwe kulomusho lotsetfwe kuletheksthi lengenhla?
Sive kumele sente umhlangano welwenyulo (1)
- 3.5 Takhele umusho lonemcondvo lowehlukile kulona lokuletheksthi loletfwa nguleligama lelidvwetjelwe kulomusho lelandzelako.
Hulumende wancuma kutsi tilwimi tebantfu titawulingana futsi tihtonishwe. (1)
- 3.6 Nika inchazelo yalesisho lesitsetfwe kuletheksthi lengenhla.
Sive naso solo sidla butfongo. (1)
- 3.7 Phindza ubhale lomusho, esikhundleni seligama lelidvwetjelwe ufake ligama lenhloniph. Sive sihlala sidla butfongo. (1)
- 3.8 Khokha umusho kuletheksthi lengenhla lotsatsa luhlangotsi uwubhale bese uveta wakho umbono ngaloku lokushiwo ngulomusho. (2)

[10]

UMBUTO 4

Fundza letheksthi lelandzelako lenemaphutsa elulwimi nesipelingi bese uphendvula imibuto letawulandzela.

Mandla ngumfundzi lowatiwako lapha Ekulinden. Uhlala khona lapha Kanyamazane phasi kwentsabakati lenkhulu. Bantfu balapha bayatilimela. Ehlobo balima baphindze bahlakule. Balima batitse dvu, uva ngetinkabi natidvonsa likhuba. Umnumzane Nkosi uvusa bafana bakhe kwekutsi babophele.

"Vukani, vukani bafana," isho indvodza seyimile.

Phela ngiyo indlela yekufundzisa lusha le. Bavuka bageze badle babophele Liwashi alinakwa emasimini. Timbambo teba fana tifomile nemicondvo yabo ihhwabile. Konkhe loku sekwengca. Hamba minyaka!

- 4.1 Shano umsebenti walesakhi lesidvwetjelwe kuletheksthi lengenhla. (1)
- 4.2 Kunesentakutsi kuletheksthi lengenhla. Sisebentise emshweni losesikhatsini lesisandza kwengca. (2)
- 4.3 Yini lebangela kutsi luhlavu loludvwetjelwe kulomusho longentasi lubhalwe ngafeleba?
Uhlala khona lapha **Kanyamazane** (1)
- 4.4 Bhala lomusho lolandzelako uvete umcondvo lolandvulako:
Bantfu balapha bayatilimela ehlobo (1)
- 4.5 Kuneligama lelipelwe kabi kuletheksthi lengenhla. Lilungise bese ulisebentisa emshweni libe ngumentiwangco. (2)
- 4.6 Faka timphawu tekufundza nekubhala kulomusho lolandzelako:
Bavuka bageze badle bahambe (3)
- 4.7 Bhala lomusho lolandzelako ube yinkhulumongco:
Nkosi uvusa bafana bakhe kwekutsi babophele. (3)
- 4.8 Kuletheksthi lengenhla caphuna imisho lemumetse tento letinalemicondvo lelandzelako:
 - 4.8.1 Umcondvo wekwentela (1)
 - 4.8.2 Umcondvo wekwentisa (1)
- 4.9 Nika luhlobo lwendlela yesento lekulemisho lelandzelako:
 - 4.9.1 Ehlobo balima baphindze bahlakule (1)
 - 4.9.2 Vukani, vukani bafana! (1)

- 4.10 Kuletheksthi lengenhla khokha sibanjalo usisebentise emshweni lotakhele wona. (1)
- 4.11 Phindza ubhale lomusho lolandzelako kodvwa unciphise emagama ladvetjelwe:
Timbambo tebafana tifomile nemicondvo yabo ihhwabile. (2)
[20]

SAMBA SIGABA C: 30
SAMBA SAKO KONKHE: 70